

Fascinanta preistorgia

In atlas davart l'Europa avant las conquistas romanas

DA GUIU SOBIELA-CAANITZ

■ **Dus nums fan endament l'attracziun da la preistorgia en noss tschientaner electronic: Falera ed Ötzi. Falera stat per la remartgablavida astronomica rimnada en la Foppa dal temp da bronz, Ötzi per il diever dals pass alpines enturn 3350 a. C., pia gia en il temp da crap tardiv.**

Lezza fascinaziun deriva t. a. da l'atgnadad essenziala da la preistorgia: Ella perscrutescha in passà ch'ins po enconuscher cunzunt u mo grazia a retschertgas archeologicas, pia senza funtaunas scrittas. Cun in terz chavazzin pon ins distinguer la preistorgia da l'istorgia. En il mund d'Asterix s'entaupan la preistorgia, represchentada dal vitg gallic, e l'istorgia, persunifitgada dals Romans antics. Il svilup dals millennis preistorics pon ins dentant chapir mo resguardond la geografia. Perquai ston ins salidar la publicaziun d'in atlas da la preistorgia europeica, nua che chartas cleras e detagliadas enina gidan a chapir ils texts d'auturas ed auturs (1). Suenten l'epoca glaziala èn umans ids a viver en las valladas oramai senza glatschers; l'atlas infurmescha pia davart il svilup en il Grischun aifer il rom pli vast dal continent tranter il Golf da Genova, il Mar adriatic ed il Mar dal nord. I vala la paina da leger lezza ovra a medem temp sco las pp. 42-47 da l'«Istorgia grischuna» d'Adolf Collenberg e Manfred Gross (2); quests dus auturs han elavurà ina terminologia rumantscha che pussibilescha da rapportar davart las trais grondas etappas dal svilup tranter la retratga successiva dals vadretgs, en il temp da crap mesau, e la campagna militara da Tiberius Claudius Nero (42 a. C.-37 s. C.) e da ses frar Nero Claudius Drusus (38-09 a. C.). L'emprima etappa, l'introducziun da l'agricultura e da la tratga da muvel, è tractada en l'atlas da Johannes Müller, la segunda, la derasaziun dal bronz, da Bernhard Hänsel, e la terza, la cultura celtica, da Rosemarie Müller.

Novaziuns duravilas

Ma la premissa da lezzas trais etappas, areguard las valladas alpinas, è stada lur «conquista» umana. Questa vegn resumada da Thomas Terberger sco suonda (p. 45): «I ha entschavì enturn 9600 a. C. Las temperaturas han cuntanschì lur nivel d'oz il pli tard enturn 8000 a. C.; per lezza giada han ins fastizà ch'ins champava en fin a 2000 m (...). Ins traversava pia gia las Alps; il renumà Ötzi, l'um dal glatscher mazza sin il Hauslabjoch (passa 3000 m) na munta tutina betg l'entschatta da lur diever. El è mort avant var 5200 onns; el dat perdida ch'ins surmuntava gia la muntogna dapi millennis, saja quai las Alps, Pireneas u Carpatas, sco territoris da chatscha e pli tard sco pastgira da stad. Ins aveva gia daditg mess ad ir contacts sur la chadaina alpina». Quella giada eran l'agricultura e la tratga da muvel gia penetradas en sias valladas. Johannes Müller: «Davent da 9600 a. C. en l'Asia dal vest ed en l'Europa èn schabegiadadas midadas che marcan nossa vita anc oz. L'uscheditg temp da crap tardiv ha stgaffi la basa da realisaziuns nundumbraivlas, ma era da blers problems socials ed ecologics d'oz. L'introducziun e derasaziun da l'agricultura e da la tratga da muvel han chaschunà in enorm augment da populaziun. Ils umans han pudì vegnir sedentars; perquai han furmas novas da proprietad cuminaivla, famigliara e privata midà la convivenza (...). Tecnicas novas han transfurmà la vita, per exempel la lavuraziun da la crappa, la fabricaziun da cheramica e l'exploitaziun ed utilizaziun da l'arom (...). Per l'emprima giada han ins erigi monuments vesavils



Falera cun ses megalits stat per la remartgablavida astronomica rimnada en la Foppa en il temp da bronz.

FOTO N. SIMMEN

per marcar e furmar la cuntrada e per sa patrunar da lezza. L'architectura da craps gronds, quella dals emprims tempels dal Proxim Orient sco quella dals megalits europeics, exprima il basegn da sa regurdar sco element ritual nov (...). Da l'autra vart remartg'ins las emprimas destrucziuns considerablas da l'ambient; uschia ha entschavì la midada da clima chaschunada d'activitads umanas» (pp. 61-62).

Da l'Orient a las Alps ed en Scozia

Per l'Europa hai entschavì sin las collinas situadas tranter il Sinai e la Mesopotamia dal nord. Johannes Müller: «En il decurs da plis tschientaners han cuminanzas da rimnaders mess ad ir ina sort orticultura cun granezzas selvadias (...). Gia enturn 9000 a. C., en in corridor tranter il Golf d'Acaba e las funtaunas da l'Euftrat, devi veritabels vitgs che cultivavan furment e dumiech, racoglievan fava, mettevan silos en il terratsch ed erigevan fortificaziuns (...). Sper la chatscha tradizionala da gazellas tirav'ins si nursas, chauras ed arments en claus sper las culegnas. Igl è cumprovà ch'ins ha domesticà animals davent da 8000 a. C. (...). Lezzas modas novas da sa nutrir e da viver han cuntanschì la Grezia e Macedonia enturn 6500 a. C. (...) e grondas parts da l'Europa dal sidost, enfin al Lai Balaton (Ungaria) enturn 6000 a. C.» (pp. 62-63). Faschain in sigl da var 3000 onns encunter vest, enfin a cuntradas atlanticas. Là chattainsa fossas communalas monumentalas bajegiadas cun megalits. Ina da las pli renunadas è situada en l'Engalterra dal sidvest, a Stonehenge (Wiltshire): «Igl è stà in lieu ritual durant tschientaners. Gia enturn 3000 a. C. han ins chavà in foss bunamain circular ed erigi in rempar; l'axa da l'access a quel rempar sa drizza vers la levada dal sulegl il di dal solstizi da stad (21 da zercladur). Enturn 2500 a. C. han ins entschavì a schlargiar cunzunt la part centrala cun blocs da crappa (...) or dals conturns; ins als ha t. a. flottads sin il flum Avon (...) e lura drizzads en rudè. En il center stattan differents retschas ovalas u circularas da megalits ch'ins duai chapir en connex cun observaziuns dal sulegl» (p. 97). Quai constat era tar las construcziuns preistoricas da las Insulas Orkney a nord da la Scozia, nua ch'ins pudeva bajegiar mo cun crappa perquai ch'i

mancava la laina: «Dapi decennis perscruteschan archeologs britannics [en las Orkney] las culegnas e fossas dals onns 3750-2500 a. C. (...). I surpronda che las fossas megaliticas da Maes Howe (Orkney) sumeglian fetg quellas da Newgrange (Irlanda); relevant è il plan en furma da cruscha da la stanza en omadus stabiliments. Lezza vegn plinavol illuminada dal sulegl il di dal solstizi; a Maes Howe croda quai sin il solstizi da stad, a Newgrange sin quel d'enviern. Domaduas fossas èn situadas en regiuns centralas areguard rituals da lezza giada: En omadus han ins chattà la medema sort cheramica ch'en tuts centers rituals da l'Irlanda e dal Reiginam uni da Gronda Britannia, pia er a Stonehenge» (p. 105). Davart ils megalits da Falera scriva Greti Büchi: «Ils alignaments da crappa tschentai tenor aspects astronomic cumprovan ch'ils carstgauns da quei temp observavan gia las steilas ed eran el cass d'interpretar exactamein il cuors da quella. Aschia ein els stai el cass da parter en igl onn calendar» (3).

Il bronz ed ils santeris cun urnas

Collenberg e Gross punctueschan: «L'epoca da bronz ha survegnì il num dal metal ch'ha remplazzà il crap, l'ossa e l'arom sco materials per construir ils utensils. Il bronz sa cumpona da ca. 90% arom e da 10% zin» (p. 43). Era l'art da cular ensemen quests dus metals per obtegnair il bronz vegn da l'ost, numadamain da l'Asia centrala, nua ch'omadus metals vegnan avant ensem. Hänsel: «Suenten 2000 a. C. ha sa derasada svelta la pratica da cular il bronz; quai è i en paucs tschientaners (...). Gia enturn 1600 a. C. eran bunamain tuts guaffens metalics e tuts cliniezs u da bronz u d'aur» (p. 110). Ins duvrava er ambrà, raccolta en Danemarc u sper il Mar baltic (Pomaranian), per far cliniezs e schizunt utensils pli gronds, per exempel cuppins, derasads en ina gronda part da l'Europa. Enturn 1300 a. C. ha ina midada religiusa sa fatga valair: «Mo uschia pon ins decelar la tenuta nova da lezza giada areguard la mort. Igl è sorprendent ch'ins ha entschavì bunamain en l'entira Europa ad arder las baras ed a sepulir lur tschendas en urnas. Lezza perioda dal temp da bronz num'ins perquai Cultura da santeris cun urnas» (p.

113). In tal santeris cun urnas individualas sa distingua radicalmain da la fossa comunabla da megalits. Gia en il temp da bronz praticav'ins la palorma sco past da funeral en onur da l'uman mort.

La cultura celtica

Ils pievels dal temp da crap e dal temp da bronz enconuschainsa grazia a l'archeologia, ma nus na pudain als dar nagin agen num etnic. Auter èsi areguard il temp da fier, grazia ad auturs grecs e romans da l'antica. Rosemarie Müller scriva: «En l'Asia dal vest, blier pli baud ch'en l'Europa, ha il fier remplazzà il bronz per fabricar guaffens, iseglia ed armas (...). Amez l'intschess celtic, a l'ur dal Gaud nair encunter l'ost, han ins chattà dacurt lieus nua ch'ins elavurava il fier tranter il settavel ed il quart tschientaner a. C.» (p. 154). Ils Grecs e Romans da lezza giada ans han transmesso documents; perquai pudainsa numnar il pievel celtic. «Tgi eran ils Celts? Archeologs, linguists ed istorichers vegnan qua a dar respostas differentas. Ins po tutina dir che las culturas da l'antica classica enconuschevan lez pievel dapi il Gavel tschientaner a. C. Hecataios da Milet e Herodot al localisavan tranter las funtaunas dal Danubi e la Penisla iberica. Quella perioda en l'Europa centrala numnan ils archeologs 'temp da La Tène' tenor in lieu da chats renunads [sper il Lai da Neuchâtel] (...). Descriziuns istoricas pli precisas èn vegnidadas blier pli tard (...). Ins enconuscha cunzunt il rapport da Caius Iulius Caesar davart la Guerra gallica (58-51 a. C.). Sco celtic (gallic) resguardava Caesar mo l'intschess a vest dal Rain; dentant tanscheva il territori celtic, tschinquanta onns pli baud, da l'Ungaria fin a l'Atlantic. L'uscheditga migraziun celtica dal quart e terz tschientaner a. C. ha cuntanschì Roma, la Grezia e la regiun d'Ankara, nua ch'ins numnava ils Celts 'Galatae'. Tuts discurrevan il medem linguatg celtic (...). Ils Celts crajavan che l'olma umana na moria betg; ins rapporta che lur spirituals, ils druids, hajan interpretà il sgol dals utschels ed unfrì umans a lur dieus» (p. 166).

Guerras e commerzi

Ils contacts tranter ils pievels celtics e lur vischins muntavan savens guerras.

Rosemarie Müller punctuescha: «L'archeologia palesa la noda guerrila dal temp da fier. Cun quest metal n'han ins betg creà furmas novas d'armas, ma quellas ch'il temp da bronz duvrava gia èn vegnidadas pli efficacias (...). Ins cumbatteva cunzunt cun lantschas» (p. 181). Dapi il temp da bronz duvrav'ins era l'aur per culaunas sco ensainas da pussanza politica. Tut quai premetta in commerzi bain sviluppa: «I deva segir ina spessa rait da vias che tirava a niz cunzunt ils flums per spargnar forza. La perscrutaziun ha remartgà baud la relevanza da la via dal Rodan e da la Saône, da la colonia greca da Marsiglia vers il Mont Lassois [en Burgogna], l'Uetliberg u la Heunenburg en Baden-Württemberg. Igl è era stà lev da reconstruir las vias dal Mar adriatic vers il Danubi e lur encunter nord. Areguard la traversada da las Alps centralas han ins chattà blier en differents lieus che controllavan ils pass; quai demussa ch'ins duvrava quellas vias stentusas (...). Dal 218 a. C. n'ha Hannibal betg gi tema da traversar las Alps» (pp. 198-199). En Frantscha, Germania ed Ungaria han ins chattà blieras «amphorae» dal segund e da l'emprim tschientaner a. C.; i sa tracta da «recipients massivs d'arschiglia per transportar vin, ieli u broda da pesch. Quels recipients eran uschè grevs ch'i viaggiavan plitost sin flums (...) e cunzunt sin il Rodan e la Saône» (p. 208).

Restanzas linguisticas sin il continent

Caesar († 44 a. C.) ha conquistà l'intschess celtic tranter il Rain, l'Atlantic ed il Chanal da la mongia. Il latin discurre ha lura surpiglià blier pleds celtics che vivan anc adina en linguatgs neolatins; exempel rumantschs èn «badugn», «benna», «chaminar», «criv» eui. Il celtic viva plinavant en bliers nums locals. Il pli prestigius è bain Vienna; ses num latin era «Vindobona», nua che l'emprima silba munta «alv» en ils linguatgs celtics. Bliers toponims latins tradeschan lur derivanza celtica cun la finiziun «dunum»: Eburodunum (York/Engalterra ed Yverdon/VD), Lugdunum (Leiden/Olanda e Lyon/Frantscha), Noviodunum (Nyon/VD), Sedunum (Sion/VS) eui. Il pled celtic «dun» viva anc en toponims irlandais e scots; en Gronda Britannia enconusch'ins bain la «Dundee marmelade». «Dun» munta atgnamain «vitg fortifitgà», quai ch'ils Romans numnavan «oppidum» (plural «oppida»). Rosemarie Müller rapporta: «A la fin dal segund tschientaner a. C. (...) han ins fortifitgà massivamain bliers bains purils (...). I sa tractava enina da mussar l'atgna relevanza e da sa dustar, tant pli che culegnas avertas erigevan miraglias e ch'ins bajegiava novas culegnas fortifitgadas sin planiras autas protegidas. Quai era il temp dals 'oppida'; bliers eran vaira vasts, per exempel Heidengraben sin l'Alp svabaisa (Württemberg) cun 1600 ha (...). Lezs 'oppida' possedevan gia qualitads da veritablas citads. I battevan munaidas, i enconuschevan la scrittira e la spartiziun da la lavur, i eran fitg populadas, i dependevan blier da lur conturns, i sa chattavan en ina rait internaziunala da commerzi e comunicaziun» (p. 222). La citad da Châteaudun en la Frantscha centrala porta vairamain in num «repetitiv» che punctuescha duas giadas sia miraglia («chastè» e «dun»). La cultura celtica è ina da quellas che han gidà a furmar l'Europa.

1. Siegmund von Schnurbein (ed.), Atlas der Vorgeschichte. Wissenschaftliche Buchgesellschaft. Stuttgart (Konrad Theiss) 2009.
2. Adolf Collenberg e Manfred Gross. Istorgia grischuna. Cuira (Bündner Monatsblatt, ISBN 3-03900-997-4) 2003.
3. En: Ignaz Cathomen ed Isidor Winzap, Falera. Falera (vischnaunca) 2002, p. 50.